

SMFA a firma acuerdo pa proyecto mantencion di monumento

ORANJESTAD - Ayera na Stichting Monumenten Fonds Aruba (SMFA) a firma un acuerdo di mantencion entre 4 fundacion, cu ta bay coopera hunto pa traha riba 4 proyecto di mantencion di monumento.

Sra. Anne Witsenburg kende ta directora di SMFA, Francisco Celaire presidente di Fundacion pa Maneho di Adiccion Aruba (FMAA), Rick Banwarie vice presidente di Fundacion Trabou Tin y director di FMAA Jerehm Campbell tabata esunnan cu a firma e acuerdo aki. Sra. Witsenburg a informa cu trabou di mantencion lo wordo haci ariba e forno di calki y tanki di awa ambos situa na Rancho. Otro dos monumento cu lo haya mantencion ta e grafnan historico na Sero Patrishi y esun na Hato.

SMFA ta propietario di varios monumento aki na Aruba y esey ta nifica cu nan tin e responsabilidad pa mantene e monumentonan y e area rond di esakinan limpi. Pe motibo aki a bin cu un proyecto pa cuminsa cu e proceso di restauracion di algun di e monumentonan y continua cu algun cu ya ta den proceso di restauracion, pero aworaki lo sigui na un manera mas structura segun Sra. Witsenburg.

Beneficio di e acuerdo



E colaboracion cu Fundacion Trabou Tin den e proyecto aki ta, ofrece nan clientenan trabou ya cu e fundacion ta percura pa busca trabou pa personanan cu ta den e proceso di recuperacion di adiccion. E manera aki ta yuda su clientenan tambe pa bolbe integra nan mes den comunidad y drenta e mercado laboral.

E acuerdo aki lo ta di benefi-

cio pa tur dos fundacion; Pa SMFA cu ta un fundacion cu no ta conta cu subsidio, y mirando cu e obhetonan aki no ta genera entrada di nan mes esaki ta un alternativa eficiente pa por mantene e obhetonan aki limpi y den bon estado, segun Sra. Witsenburg.

Segun Fundacion Trabou tin e ta un manera pa apoya nan clientenan y duna nan e experiencia necesario pa den futuro por drenta e mercado laboral bek.

E forno di calki y e tanki di awa cu ta situa den Rancho ya ta den e proceso di restauracion pero lo continua cu e cooperacion cu ya ta tumando luga algun tempo entre stichting Rancho y diferente partner. Nan ta haciendo nan esfuerzo pa mehora e area di Rancho y e capacidad turistico di Oranjestad.

Fondo

SMFA A acerca Tourism Product Enhancement Fund pa ayudo financiero pa e restauracion di e forno di calki.

E trahadonan lo ta encarga cu e trabounan di mantencion y lo ta bou di guia di e Fundacion Trabou tin. Trabounan lo cuminsa mesora segun Sra. Witsenburg. SMFA y Stichting Trabou tin ta uniendo esfuerzonan hunto tambe pa por yega na fondonan pa adkiri un bus pa por transporta e clientenan pa e luga di trabou. □